

Yakk Bechilé Ázmán

Monir Momen



Yakk Bechilé Ázmán

Monir Mómen

Pa watá déwánagá tai zend sakk ásán kotag
Chanké nád o do kapódar, yakk bechilé ázmán

Nechén

Rang róchay shapá gendag lóthant	7
Machkadag	8
Perband	11
Drapshetag Éoki	12
Anchén nakshé mani negáhán ent	14
Tonnigén keshké ay na shepádén cherágé ay	15
Kóh o gyábán, damk o daryá róshná	16
Shishagén wáb o dráhián próshay	18
Shap bójigé sázag bit	19
Eshkay waylay shekár buán ant	21
Kay ent ke emrózay chérén rázán chó áshkára sorénagá ent	22
Zamánagára tai zébáia goshag lóthán	23
Baré yakk hájaté sáyán, baré nókén gamé ménán	24
Chamm telahkár buagá ant goshay	25
Hár nun métagán gerán ent padá	27
Shap	28

Del tahár o zahir kambar, yakk bechilé ázmán	32
Dán kad ganók eshkay bechárit watá borawt	33
Yá besáz zendáné yá boprósh bárigé	34
Karpásokén bramshé mán tawárán ent bary gón	35
Dard o mahram bebán kojá borawán	36
Bramshé déwánagén cháraráhá hatam ródénit	37
Tahári yátgáre buagi ent	38
Del darámad cha keshk o rahbandán	39
Mehray sháné tará chenán o dayán	40
Régzáré nayke gyábáné zeré	41
Dazgatth án cha sim o sanán	42
Dóshi Koduán Náletag	43
Wábáni Sakrát	46
Tamáshá	48
Shanzán Bu Estinbadan	49
Armán	51
Del Máná Bit	52
Pajjár	54

Donyá	55
Wadárig ent jahán diwáléay poshtá o shap démá	56
Hastiay maiyatá boshód o beday	57
Dáragi ent bale zendagi móh nadant	58
Mesk o abirén malgórán dasté shengén dasté péch	59
Shap ke kotthet pasht nakaptag del ágáh	60
Angarén ahdé byá keshén damkán	61
Hórk incho makan bégahá kaddahá	63
Dam bortagant negáh wati tonnay nóshagá	64
Armán rókén angar ant	65
Shántolé dur nálagá ent maná	66
Tonnig ent del daryá wáb	67
Morg o mósom buténant	68
Chammán wábé lonthán dwáé rahn kotag	69



Rang róchay shapá gendag lóthant
Dóst wábay wadhá gendag lóthant

Taw ke shahmé ay bolóréay tahá
Chamm tai sáhegá gendag lóthant

Machkadag

Tangahi
 É tai machkadag
 Hawr o gwátay sará
 Dratkagén akséay dróshomá
 Laddhetag cha jalashkání shahrá wati
 Chóke pirzáléay konthén maymay wadhá
 Gón wati hastiá dhik dant o kapit

Tangahi
 Man tai Sahti án
 Ásén warnáiy bár mán kópagán
 Taw begenday mazánay maná
 Man korócháni tai sáhegá rostagán
 Man ke hamedá wati zébnáki chetag
 Taw nadistag maná
 Goddhe taw
 Wahdé hámén but

Tai é maccháni garkán kolónthán cha gésh
Bénagén kessaháni wati hósh man dratkagant

Tangahi

É wa annugén yakk róché at
Man ke gwastán chedá
Sádé pádán adhet
Chóke kabgéá maré patáyán kant
Anchó tonnigén chammán patátag maná
Páday pádinká bass kammokén mokketag
Chont ádéknén sawtáni zaptén badan
Atk o pádáni chérá mani proshtagant
Man pa sad moshkolá
Márpéchén badan nazz ártag wati
Didagán cha dar atk o deláni tahá ér kapán butagán

Angarén tonn wahdé wati nawbatá
Narmén rakkáni nyámá mani báletag
Kandagi butagán
Bass hamá ent padá....
Hawr sáléá mahtal bebit
Yá cherágé cha bángwáhá pésar merit
Kárwáné gesar bit cha keshká wati
Yá anágáhá yakk zemeré
Wábén damkáná pádink pádá bedant
Dors chárant mani némagá
Man
Man é Sahti!
Wati dág o pólengén zébáiyay

Máneshá kabr bán

Tangahi

Sakk sharr kot gesar butagay

Zendagi

Shahdén zébáiy kandagé ón nasaggit edá

Taw nadistag maná

Man tai Sahti án

Man ke é zébnáki wati

Chó kolónthá tai maccháni chérá chetag

Del goshit

Taw padá kammén wátarr kotén

O saruná mani dág o pólungén zébáiy

Máneshay

Yakk koróchéay gwangé jatén

Yakk damé

Man gón delá, gón razáyá wati kandetén

O padá man o taw

O tai machkadag

Har sayén waptatén

Perband

Zendagi halwatáni gyábáné
Wahday arwáh kapóti kabré
Kassé kayt kukué málit
O kasé arsé keshit

Taw ke rangé ay, jalakshay
Taw ke pollé ay, srapay
Taw ke meské ay, sabáháni sará tálán bay
Taw ke sanjé ay
Saray shódagá káay mani chammáni tahá

Man bale ahdéay páband án
Natránán dardé
Man bale mehréay wáhond án
Narandán keshké

Drapshetag Éoki

Zendagi ke edá
 Yakk gongén nalé
 Béwasén sáhdáriay bolmay gwará
 Bétawáriay názénk rómost kant
 Zangán zurit delay
 Didagán jost kant
 Chóke mán durbonén chátéá kaptagén
 Tonnay shahmay wadhá
 Chó tahárén shapá
 Bécherágén darigéay pach buagay hájata
 Chó kolóhay wadhá
 Chóke bechkandéá
 Drapshetag éoki

É abétki dawáé naent
 Jangalá kall kot o kóh per dátagant
 Zi edá
 Kilag o kawr o kóh
 Meskén gyábán o zer
 Koll cha didagán kaptagant
 Marchién rang o bó

É chedhekká
 É diwál o bramsh o darig
 Bas tawaréay sengay sará rostagant
 Hecch nést ent
 Na alháné góshán bejan
 O nedárah bekan
 Chóke bégwáhén mondrikéay
 Tránagáni wadhá
 Chó shapá
 Chó tahárén laday kaptagén suchená
 Drapshetag éoki

Gendagá ay cheragéay dután cha halké thahit
 Halká zurit kasé
 Rahnén yakk dottokéay kathuray tahá chér dant
 Dánke é máh o rócháni
 Tawwáp sarjam bebit
 Pa wati chonkiáni gamá
 Zendagén shántolé
 Kant wahdá polónchá wati
 Pa dege bédehé bál kant
 Wahday dastáni angár kaptant zera
 Chóke béaksén ádénkéay wáhagá
 Chó cherágay lahá
 Chóke nádráhay bésetrén oppáragáni wadhá
 Drapshetag éoki



Anchén nakshé mani negáhán ent
Maymay pádán zari patáhán ent

Marchi bon geptagant deláni halk
Sohb mán surmagén kabáhán ent



Tonnigén keshké ay na shepádén cherágé ay
Gón didagán natránay, che paymén cherágé ay

Sóhán kant seláhán pa taw gwát har shapá
Tahnáén métagéay ganókén cherágé ay

Chóke gerók shahmay o chó zémerá bojay
Bandigén shántolé ay ke bálén cherágé ay

Har maiyatén darigá tai bramsh sraptagant
Gwátáni hamzobán ay, malangén cherágé ay

Didagzebahrén mósoméá sanj butagay
Enjirén sháhadháni shodikén cherágé ay

Tai sáhegá madrapshant mani dard chón kanant
Pormehrén didagé ay, tabibén cherágé ay

Nun gellaháni danz rodán ant tai sáhegá
Dódáni kwahnén halká nawáén cherágé ay

Har pás bálán man tará arwáhay máneshá
May gwastagén shapáni taw wábén cherágé ay

Hóshámé bar kanán ent Monir didagán mani
Rozhnáén nur ay taw tanakkén cherágé ay



Kóh o gyábán, damk o daryá róshná
Taw cherágé ay, tai donyá róshná

Sambahant bandén darigáni nasib
Chamm salámat har tamáshá róshná

Byá zemestán póshagá ent métagá
Byá manará ás pédhá róshná

Mortagén mardáni armánán kotant
Rotkagén kabráni dhiwá róshná

Yal nadátag man tai námay gerag
Gwátá kortag har chedhekká róshná

Sohb bósit shengén malgórán tai
Shap chedá raptag, nun pád á róshná

Pésará man pa taw bálet del wati
Butagant estál randá róshná

Taw ke jonzay, jonzant máh o róch ham
Tai mosáper kawshay har tá róshná

Drapshay taw wábáni hankéná wati
Man wati kawláni démá róshná

Harkojá chárán Monir gendán watá
Mehr tai ádéncay paymá róshná



Shishagén wáb o dráhián próshay
Neshtagay proshtagén botán próshay

Kandán kandáná holkahán próshay
Anchóke jawzi dánagán próshay

Didagán dām o móchkén chetant
Taw ke wahmáni bānzolán próshay

É kalátán cheret názénant
Pa kay sawtáni mohragán próshay

Pésh dárán kayá delay chondhán
Taw wa rájáni sannatán próshay

Gazz kawray sorant tai gégáná
Parchá chó nagdén loddhagán próshay

Na hatam rang dant darig o darán
Na taw chammáni mozhdahán próshay



Shap bójjigé sázag bit
Wáb cherágé bálag bit

Gwátá josté dastá ent
Daryá chón bádénag bit

Tai malgóray kaypay mojá
Bégáh chammé surmag bit

Áp kawará nesht nakant
Ás delá pahrézag bit

Anchóke taw rást goshay
Dróg ón anchó bandag bit

Gwátá maktab matth kotag
 Ásá rasm, rabédag bit

Gón má zendag bu zánay
 Lahté zahr hawádag bit

Sénag halké ábádén
 Mehr mabit ta kénag bit

Labzán harkas setr kotag
 Gongén ahd wa chédag bit

Zébái tai ranj mabit
 Del wa padá répénag bit

Incho cherágáni nyámá
 Tahná shap delwárag bit



Eshkay waylay shekár buán ant
Morg may hamtawár buán ant

Dóst o yáráni surmagén gellah
Jangaléay gobár buán ant

Chónén háméné ke drachkáni sará
Rang tai áshkár buán ant

Taw nayátkay o poll óstáni
Nun sarichkáni hár buán ant

Menzeláni cherág mortant Monir
Keshk ham béwadár buán ant



Kay ent ke emrózay chérén rázán chó áshkára sorénagá ent
 Tai zébnákiá gón janán ent, mani tawára sorénagá ent

Tá kad chó bé rang o chádh nendán, tá kad é dámon abétk mánit
 Zahiray pádinká zémerénit, gonáhé shára sorénagá ent

Bechár zenday padardén arwáh tai rangá bandikéá gón bastag
 É tonnién bégahá kapótáni har katára sorénagá ent

Tai darday chádh ent ke gwánzagá ent jahán kollén gón rang o dábán
 É chawl wápénagá ent mára, é chawl mára sorénagá ent

May jonz mahtal pa jalwahán tai, may kerd gón wáhagá tai émen
 Chó pád keshká shoházagá ant, chó dast kára sorénagá ent

Monir gwátay zaipén arwáh kai mehlabán incho shór dátág
 Bechár kawshá gón lahmén krámán é kóhsára sorénagá ent



Zamánagará tai zébáiá goshag lóthán
 Man máhé án na chérágé bale balag lóthán

Hamé damáná hatam kayt o bit mani mehmán
 Hamé ke ach watá dhanná man dar kapag lóthán

Tai gamá gón mani jend ham sharik naent
 Tai zahirá man ach wat ón pach gerak lóthán

Man sestagán cha wati maymá mohragay paymá
 Tai anárkay saray arsé án, badag lóthán

Abayd ach tai rangá dege mamánit hecch
 Wati man ahdá hamá géchená kanag lóthán

Damáné pa maná atkay, zarant del o donyá
 É róchá káparay jamkéá mán janag lóthán

Man zendag án ke tai gwáhiá bedant kassé
 Man neshtagán tai kolóhé watá dayag lóthán



Baré yakk hájaté sáyán, baré nókén gamé ménán
Maná darmán berépénit o dardé man berépénán

Sagáré, markabé, kabré na dáwá na gobaré hast
Kay ent angat sorénán kant mandilán negárénán

Hayáláni damag sabz ent o wahmáni ramag tálán
Zemin chó ázmáná ent o dardán shénk chárénán

É del, é mehlabén rangáni addirah salámat bát
Agan mósom bematthit man dege nimóné bádénán

Kojám keshká á wátarrit, kojám hankéná menzel kant
Damé pésar byatkénán yá sahté pasht bekapténán

Tai óstay táhatay setká baheshté sázetag pa man
Negáh chó sojdagá dratkant darigán bénomázénán

Hamá armáná roshná kan, hamá kwahnén delá bálén
É shap dán menzelé bortag cherágán nókgáménán

Monir shaydáén morgáná mani halkay amánat gón
Hatam mán bánzolán péttag kapótán delgayábénán



Chamm telahkár buagá ant goshay
Wáb estár buagá ant goshay

Taw kojá ay, tai shaydá o ganók
Nun padá sár buagá ant goshay

Marchán kandáná shalant cha chammán
Ars makkár buagá ant goshay

Zahrnák ent may jédhagáni badan
Wahm syahmár buagá ant goshay

Dardá chádhé na lezzaté gón ent
Del gonahgár buagá ant goshay

Taw ke hankén wati matthátæg
Keshk bázár buagá ant goshay

Rangay ásá tai shódag lóthant
Zahir légár buagá ant goshay

Péch malgóran ke cherágáni
Kárawán gár buagá ant goshay

Pa maná sártén mehr shanzán ant
Shénk tai shár buagá ant goshay



Hár nun métagán gerán ent padá
Darp hóshámay sar rechán ent padá

Wahday tawkal chó kadhabbá proshtag
Bánzolé jambarán adhán ent padá

Ásay drachké padá keshag lóthit
Embari hawr mehrawán ent padá

Man nun zánán ke keshká mattháit
Hamsapar kallié raján ent padá

Sayl bekan wahday niyatay rangán
Bad goshán ent o bad kanán ent padá

Zi tai zébáiy rangán gwartag
Darday hámén pad gerán ent padá

Kawsh déwánagén bégáhay Monir
Zahirán jigá mani moshán ent padá

Shap

(1)

É tahárén shap mani bináén darday hambaló
 Parchá bandit bánzolán
 É keshk o dar gimortagén
 Pa shahmi trampé, pa chedhekkái bolórén thokkoré
 Cha ázmánay sabzokén daryáyá ádem raptagant
 Byá mani bináén darday hambaló
 Byá maná chó sengoké
 Dastá kan, ápá dawr day
 Balkén rodit bramshé o shahmé rók bit
 Taw éok ay, man éok án
 O éok ent é wahd chó wayránagay
 Tahnáén yakk macchi boné

(2)

Delá wa báz lóthetag
 Wati zamánagay shapára chamm per kanán bale
 Wati tahá ke sar jatag

Hazár keshk kabr atant
 Hazár randá gón watá
 Man dhik wárt o kaptagán
 Padá gón dastmóshián
 Watára dist man
 Tai rang o zébay dargahá
 Tará gón halwatá atán
 “É shishagán bozur o
 Kammén nur mán bekan beday”

(3)

Kasánokén chedhekkahé nabut
 Cha jengolá sobakter ent
 Wáb wahdé bál kant

 Wáb wahdé bál kant
 Ta didagán samá nabit
 Na cherág chakk janant
 Na sarjahá cha halwaté rodit
 Kasánokén chedhekkahé nabut
 Man jédhagá atán
 Morg drachkáni ke armán ant
 Paché bál kanant
 Hórkén chammáni koduáni darán band kanán
 Sar janán waptagén damkáni tahá
 Shap wati mahparán pécháná mani démá gwazit

(4)

É tahári zeré

Chamm goshay ráchen ant
 Poll o estinén cháder tai
 Drapshagá ent mani
 Béwatén éokiay zerá
 Chóke ácháréa
 Byá mani didagán
 Sháray lambá beband
 O bebar gón watá
 Yá zeray sénagá
 Chó cherágá bebal
 Máhay paymá becham

(5)
 Por harid ent
 Mani gyábánay kapótáná bogosh
 Balkén nun sotkagén sénag
 Ón nehádé kárant
 Balkén bon geptagén peryát ón
 Kára byáant
 Mani gyábánay kapótáná bogosh
 Jannat o bágén koduán
 Wati chammáni tahá chér dayet

(6)
 Hamsapar, é taw ay
 Yá tai óstay shap ent
 Chó tahárén zerá
 Chawl jant didagán
 Sheng ent har némagá

Chóke gyábánéá
 Hamsapar, byá darigán bopósh
 Dán macharán kasá
 Hamsapar, byá mani didagán dág day
 Dán magendán watá

(7)
 Chó péchdárén damkéay nasibá shap
 Ke táb wárt o gár bit wati tahá
 Agan é ázmán ágah ent
 Godhá bogosh ke bramshé, trampé dém day
 Del o negáh chórah ant
 Hamé damáná thithié tawár kant
 Chó ásay drachk o ápay róshnáia
 Mani tahá rodit
 Rechit, proshit o gár bit
 Man bramshé án, man trampé án
 Tawaré án o áse án
 Bale shap ent
 O péchdárén damkay har padag
 Ke ér rawt tahária



Del tahár o zahir kambar, yakk bechilé ázmán
Gozhnagén chammáni ásar, yakk bechilé ázmán

Pa watá déwánagá tai zend sakk ásán kotag
Chanké nád o do kapódar, yakk bechilé ázmán

Shahmit chó durén geróká, hoshk bit nambay wadhá
Zend o marg o pors o sarbar, yakk bechilé ázmán

É zemin káhé ke rostag nawbatay sengi shamé
Kalkashánay tarr o mántarr, yakk bechilé ázmán

Ach tai yádáni kohdémán gwazit, rawt ent kojá
Bazzagén óstáni kótar, yakk bechilé ázmán

Mawjerén wahmáni tandán póshetag donyá Monir
Brahmagén setkáni rahsar, yakk bechilé ázmán



Dán kad ganók eshkay bechárit watá borawt
Dorsén darig kór ant, tamáshá kojá borawt

Har tábay dámoná edá kabr ant del o negáh
É péchdárén damkáni táleh kojá borawt

Bell mohragén zahir madóch giray dámoná
Anchén sabakké wánén ke zután delá borawt

Tai shirkenén wadaráni hámén páshk bit
É didagáni tonn pa wábá kojá borawt

Mardom kasánén shahmé begendit, ganók bit
Taw anchó zébdár ay ke sabré sará borawt

Má tai zahiray róshenén danzay mosáper én
Kassé byayt gón má, nabit ent jetá borawt

Anchén gamé beday ke benakashit zamánagá
Bóshtit chó kóhsará o máray wadhá borawt

Kassé maná cha wahdá jetá mánáé bedant
Pa man edá byayt na gón man chedá borawt



Yá besáz zendáné yá boprósh bárigé
Chincho résetag wahmán bétamáhén bandigé

Halk cha tai jalwáhay rangán anchó sar retkag
Byá bechár har didag bénagáni kánigé

É ke rahsarán sheng ant, tonná dátagant bálád
É mosáperén drachkán gón naent kalligé

Gón watá tawázah kant, wat wati sará kandit
Shahr ke ganókéay marchi dertagén jigé

Hiskagáná wáres nést, ars ham darámad may
Wáhagay shahidáná pors o nayké porsigé



Karpásokén bramshé mán tawárán ent bary gón
Némchammi chedhekkáé ke chárán ent bary gón

Dardé ke mani zémerán péchán ent majédhy
Zahiré ke tai kessahá árán ent bary gón

Bésodd cha wat o wati donyáyá ganóké
Tai mohragán dábáni shomárán ent bary gón

Darday hamé dhiwá ke nakoshtag shapay gwátá
É chamm dege wábéay homárán ent bary gón

Chádhé ke tai didagay tásá ent beréchy
Torsé ke mani shahray gobárán ent bary gón

É gwát ke arwáhay sará shanzit zabádán
Sázáni delá dast samárán ent bary gón

É mósomá gónápé nakeshtag mán darigán
É óst goshay jambaré gwárán ent bary gón

Danzé ke Monir rahsarán óshtáttag mácháry
Shahmé ke wati dámoná dárán ent bary gón



Dard o mahram bebán kojá borawán
 Sár o barjam bebán kojá borawán

Shap taw ay, shahr taw, cherág taw ay
 Nun man jahndam bebán kojá borawán

Tir zébáiy kamáná ent
 Morgán gón ram bebán kojá borawán

Gón tai loddhagán malarzit del
 Incho mohkam bebán kojá borawán

Sáheg ay zerday, ápsar ay chammay
 Bé taw sarjam bebán kojá borawán



Bramshé déwánagén chárráhá hatam ródénit
Tarrit arwáhay wati gárén kelitán pólit

Kandag o arsán mán yakk táséá ménag lóthit
Róché róché wa maná darday talab kandénit

Ach maná dur bebit, gwátay mokámán dozzit
Kayt nazzuká ta ótágé cha ásá kasshit

Óst hankénén ganóké tai gyábán nasib
Angarén kukuán zurit o gedáné sázit

Zémerénit wati pádinkán o jambar gwárant
Á mani dráhiá kawréay wadhá mattháit

May ganóki ent hamá o may sáray sár hamá
Chammay karkénkay tahá mehlabén sanján ménit

Enshapi nódé beshanzit, drahén didag boddhant
Enshapi ásé bojonzit, delán pédháit

Chébari wáhagay mitápá man angar keshtag
Tonn wati bénagén shénkán mani lonthán málit

Anchén shahmé Monir gyábáná rajit bázaré
Anchén bechkandé kalátáni delán tarrénit



Tahári yátgáré buagi ent
É máhára gobaré buagi ent

É wahmé ke koduán wábá naylit
Yá gyábáná dayaré buagi ent

Damáné bár dant hóshámay shahrá
Nun daryá régzaré buagi ent

Mán jenday andará harkas bethappit
Abétki kóhsaré buagi ent

Panáh dant dorsén waswásán deláni
É béwánki dayaré buagi ent

Tawámén omr óstán gwánzagá kant
Hamá ke pa gedaré buagi ent

Hamé ke neshtag ent chammáni tóká
Monir é tors méré buagi ent



Del darámad cha keshk o rahbandán
 Kaptag hóshám shakkalén shandán

Taw wa démá mani wadára ay
 Man kai ahday sáhegá zhand án

Harjáh cháráy taw hatam ródénay
 Chamm adhán ant gón shishagén tandán

Pa ganóki adhán o gishán ent
 Del gón dánáén wahday rahbandán

Man Monir sháhén wahday hamsáheg
 Tonn nóshán o shénk per bandán



Mehray sháné tará chenán o dayán
Dódmáné tará chenán o dayán

Taw ke hamráh ay zeminay keshkán
Ázmáné tará chenán o dayán

Máh o estál tai chammán wapsant
Surmadáné tará chenán o dayán

Wahd waptag sagáray sácháná
Byá kamáné tará chenán o dayán

Bell chó arsa tai kotthá berechán
Tai nesháné tará chenán o dayán

Bu kapóte o delay bastá byá
Buch o dáné tará chenán o dayán

Taw mani pádán keshk pédhátant
Man gedáné tará chenán o dayán

Parchá thahláni teláhán réchay
Nogradáné tará chenán o dayán

Belly póshit Monir may ahdán
Byá zobáné tará chenán o dayán



Régzáré nayke gyábáné zeré
Kaddahé tonnigén paymáné zeré

Má tai chammay tahá shóházetag
Gwandhokén pézhgáhé ázmáné zeré

Moj ke nendit genday kóhay dámoná
Gozhnagén apsé o kádáné zeré

Nawbatay béwábén chammán mán kot
Daz bekaptén kadde darmáné zeré

Harkasá gón but nódi sáhegé
Bahr bobutén genday ensáné zeré

Má pa taw harróch nesht o gwaptagat
Kessahé sártén zemestáné zeré

Taw gesar butay ke sestag ach maná
Didagé ósté o mahkáné zeré

Bé tará déwánagén é del Monir
Proshtagén bójigi sokkáné, zeré



Dazgatth án cha sim o sanán
Neshtag laybu jódh kanán

Marchán ach taw béhál án
Marchán gón wat gapp kanán

Chamm gón pádán deltang ant
Del dróhán ent golbadanán

Wahday pódhá bórénán
Drachk o dárán shayr kanán

Dér ent tarr o gard nabit
Dér ent ke man béwatan án

Sar geragi ent, tóshag nést
Margá wati man rahn kanán

Chincho kabr bokóchán man
Dánke watará dar bejanán

Móh nabit ke tazhnán tai
Byárán pa wat sar bekanán

Dóshi Koduán Náletag

Porzemérén dardé nabutag tálehá
 Pirén chenáléay boná
 Armán chó tákán retkagant
 Dam bortag nálókén nalán
 Kassé edá proshtadelén
 Damkáni báládá
 Namálit mehlabén dwáyán wati
 Man gón wati hórkén delá
 Delgósh atán
 Del chó kapóté béwas at
 Na shahmé rostag holkahá
 Nayke chedhekkáé balet mán didagán
 Ke nágahán...

Dóshi koduán náletag
Átrápy zémer máletag

Dóshi koduán náletag
Addirahán kessah kotag
Zend yakk hanóshén mehlábé
Sohbay hamok chánthay sará
Parréchit zolpán gwaptagén
Wahm o gománán bahr kant
Shámay teláhén métagá
Kaypáni jué kant rawán
Chó máhekán...

Dóshi koduán náletag
Addirahán kessah kotag
Nawbat gón chawlán chikui
Chóke malangá sarbatag
Menzel janán
Mastén maláráni sará
Wáb ent o ágáh ent baré
Róchá gón rang o jalwahán
Kant dastay mondriká wati
Dorsén gonáhán tollosén
Mán págay péchán mán jant

Dóshi koduán náletag
Addirahán kessah kotag
Bim chó ramézáni srapé
Béwánkiá shép geptagant

Mán wahday bógáni shamán
Wahmáni dazródén keshár
Chó jangaléa sabzetag
Sohbáni mesk o mehlabén
Pézhgáh gwátá roptagant
Shámay teláhén métagá
Kaypáni juá tam kotag
Danzé ke tálán ent sará
Dardé ke péchán ent watá
Gón zend-esmén holkahay
Damkáni dráj o márpéchén lankokán
Na shahmé rostag holkahá
Nayke chedhekkáé balet mán didagán
Dóshi koduán náletag
Addirahán kessah kotag

Wábáni Sakrát

(Wádh nambar 6, Passeni)

Proshtagén óstáni dhanné sirkagén
 Pipokéá seng mán
 Badtawárén dódéá dastá kotag
 O layb dárít métagá
 Angarén chammán gón chárít métagá

Taw ke bár dáttag
 Mani chédag wati arwáhay gongén máneshá
 Man tai chahrag wati chammáni lonjén gobbahá ógáretag
 Taw magosh ke man kay án?
 O man nadhassán hecch tará
 Taw nazánay taw wati

Maiyat shamoshtag mán kojám chánthay dapá
 Damk chó apsó shedán ant o gwazant
 Pádmál ent Ádamay óbádagay
 Bé chamm o pónzén ákebat
 Thithalén wábáni sakrátá chó danzá jalletag
 Man wati dóstigén chamméay tahá sar kasshetag
 Dán mahsharay wábá godhet
 Chó tazbiay yakk ámagén ótágéa
 Sestag zamánag...
 É damán o róch o máh o sál
 Shengáná gesar butant cha yakké domiá
 Chó mohragá
 Kay bezánt ke taw kojá ay...?
 Man kojá...?
 Kass wati jáhá naent
 Bass thithalén wábáni sakrátá chó danzá jalletag

Tamáshá

Na émeniay jalashké na darday ásháé
Hamok dábay tahá wáb rangay daryáé

Na kwahnén rasmay wadhá ent na nókén dáwáé
Shepádén pádéá póshit didagi táé

Rawán ent chawl janána goshay ke daryáé
Tamáhay ásay tahá mán dant zébáé

Negáhay dámoná nazz áragi tamásháé
Mán wahday sénagá singáragi tamásháé

Shanzán Bu Estinbadan

Shanzán bu estinbadan
 Shanzit tai nódén tránagé
 Gédi málárén chawl jant
 Man gón molurén jédhagán
 Démá kanán ahdá botá
 Damk o darigán sharr kanán
 Sohban o bégáhán gwapán
 Sáchán pa zendá mósomé
 Shanzán bu estinbadan

Shanzán bu estinbadan
 Kaypáni tonnigén taman
 Shengit wahdé rahsarán
 Bégáhay barpén kaddahá
 Angárén zaymán mán kant
 Nóshit wati tahnáíá
 Shanzán bu estinbadan

Shanzán bu estinbadan
 Waswás o mónján kambarén
 Anchén padánké sázetag
 Dorsén darigán métagay

Mast o homárén shántolé
 Péchit wati chammay tahá
 Bit narm narmá sar kapán
 Shanzán bu estinbadan

Shanzán bu estinbadan
 Taw gón bolóren shanzagán
 Chó sanjay paymá botkagay
 É rang rangén holkahay
 Damkáni táleh gón wati
 Mórdánagán taw nakshetag
 Man pa tai yakk shahméa
 É omray tazbi kasshetag
 Shanzán bu estinbadan

Shanzán bu estinbadan
 Syahmár zendánén shapé
 Tahnáiy chammán dajit
 Zébáiá résán kant
 Bal gón tabibén halwatán
 Shal gón cherágén bánzolán
 Chammáná ómáné beday
 Wábáná darsháné beday
 Shanzán bu estinbadan

Armán

Már chón sapar kanant
Hamé wadhá
Jengolé chón bésamá o bépakár bál kant
Áp chón péch wárt o chawl jant
Zémeré chón chest bit o jahl kayt
Gwáté anchó kól dant
Ás chón bétalab balit
Hamé wadhá
É shahray damk o métagán
Chó áp o gwát o zémerá
Chó ás o már o jengolá bebán
Kojám rang matth bit?
Kojám dard enserit?

Del Máná Bit

Ay gór-bashánag-bánórén emróz bechár
 Kandhig-gwarén yakk morgéa
 Mán sonthá chetag o bál kotag
 Hecch sawt nasraptag chágérdá
 Hecch dánk nakaptag hankéná
 Bass mónjé táb o rés waráná gwast chedá
 Ke gál nabant del máná bit

Bell áskarárén dargáhá
 Yakk sahté zemestán jágah kant
 Bell dard rabédag mattháit
 O zahg pa másán pás janant
 Gón rangán sázant názénké

Yá laybé lonthán chaspénant
Ke gál nabant del máná bit

Kai giray surmagchammén bot ant
Bégáhay darigá sar kasshant
Némbálén gobaré ráhsarán
Hónakkén kolóhé per réchit
Estin natránant sáheg bant
Nun bramsh keshay yá chádh ronay
Ke gál nabant del máná bit

Kad wáb kapit é gamgréshag
Chamm nazz kotant koll áwázán
É ahdai sherishay shikuén
Har sháhay sará
Shap chawl waráná jédhán ent
Ke gál nabant del máná bit

Pajjár

(1)

Taw cherágé buténay
 Man watá shapé sázet
 Nayke bálué bután
 Na watá darigé kot
 Nake didagé bután
 Taw cherágé buténay
 Man cherágé buténán

(2)

Dur bay yá nazzuká
 Pa man sháhegán ay taw
 Sohb bit yá bégáh
 Pa man mayzar o sabz ay
 Pa taw sar janán án man
 Gón shodikén dhiwáyán
 Pa taw dam barán án man
 Gón zaipén arwáhá
 Harró bramsh ródénán
 Taw mani charágjáh ay

Donyá

Man tai zébáiy shishagéay tahá
 Ér kortag pa wat
 Sabzén hazzáméay sáhaté
 Yakk kodué
 Koduay tahá shirkenén kukué
 Yakk darigé
 Ke sohbay sará
 Tyábay chawláni porzémerén bramshéá pach bebit
 Sárt o rozhnáén yakk
 Hordén tahnáié
 Arsi trampay wadhá
 Kadde yakk mohragé
 Ke bedárit maná o tará o hodáyá mani



Wadárig ent jahán diwáléay poshtá o shap démá
Chedhekkáyán delá wápén sapar démá o shap démá

Man parréchán wati hóshámay ótágán ke sar begerán
Wati chawlán patáyán ent maná daryá o shap démá

Na é keshkán sagé ráshit na bimé pádán pédháit
Man o armán o del tahná, jahán tahná o shap démá

Tai ahday ganókán zahr cháréntag hamok dhiwá
Chó mára táb wártag wáhagay keshká o shap démá

Monir man gón delá nesht o cherágén dard názéntant
Modám nádént má poshtá wati donyá o shap démá



Hastiay maiyatá boshód o beday
 Áp o ásay tahá boshód o beday

Chell o póleng ent mani shálay wadhá
 Shahray gwátá maná boshód o beday

Didagán bell gón gobarán sélant
 Arsé chó mohragá boshód o beday

Sayli estunéá maná goshtag
 Ázmánay ladá boshód o beday

Koll shahmókén chedhekká waptant
 Nun shapay niyatá boshód o beday

Zaymán chammáni dágdár kotant
 É cherágán padá boshód o beday



Dáragi ent bale zendagi móh nadant
Jonzagi ent bale zendagi móh nadant

Harka neshtag wati máneshay sangará
Torsagi ent bale zendagi móh nadant

Tai zahiráni halká nesháné wati
Pólagi ent bale zendagi móh nadant

Bim dant jédhagáni shapén jangjá
Lekkagi ent bale zendagi móh nadant

Cháretag marchi ádénc man nawbatay
Kandagi ent bale zendagi móh nadant

Wahdá ádénc gón taw damé, katrahé
Jallagi ent bale zendagi móh nadant

Man wa zánán Monir mehr tai pa maná
Zendagi ent bale zendagi móh nadant



Mesk o abirén malgórán dasté shengén dasté péch
 Ásbolórén didókán shahmé shengén shahmé péch

Dánke gwánzag ágáh ant, dánke armán trán kanant
 Zarr o teláhén lilawán pásé shengén pásé péch

Tás-shakunén ahdán may belly háré zurit rawt
 Tonnigén koll ekrarán róché shengén róché péch

Óstay tandán dón kotant pa tai wadára béwáb ant
 Proshtamaymén róshendán bramshé shengén bramshé péch

Bór mán kessah nál bebant o zahm mán shayrá bramsh bedant
 Wahday gayámén kohdémán halké shengén halké péch

Distag Monir taw dáem gón drachk o dárán hamzil ay
 Béwánkiay hankénán shayré shengén shayré péch



Shap ke kotthet pasht nakaptag del ágáh
Pa taw neshtag gón man nawaptag del ágáh

Má chó shayray rangá kamátag waswásé
Má chó kessah nesht o gwaptag del ágáh

May wábáni nazziká máhé barkat but
Ach má anga dur naraptag del ágáh

Cha tai zébay dargáhá bébahr naent
Pásé rók ent, pásé sraptag del ágáh



Angarén ahdé byá keshén damkán
Yá zemestáné per dayén damkán

Shahr ártag kayá chagal dátag
Marchi daryáyay proshtagén damkán

Má wati mehray mosallá pach kot
Mán gonahgár butagén damkán

Marchán tahnáiyay jámag lokk ent
Byá gón megrázéá chenén damkán

Nést kassé ke bebárt en(t) lógá
Delshodik o mosáperén damkán

Wáb sohbá drahén chandhag lóthant
Kassé rópán ent waptagén damkán

Sánkalon rézetant karáráni
Byá chó tawká gwará kanén damkán

Kay bokóchit o dar begéjit maná
Dráhiay bár dátágén damkán

Jallaké chónén áshekén arwáh
Táb dant ábréshomén damkán

Máh estálén didagán réchit
Surmagén shahray shépagén damkán

Kollén donyá Monir éokk ent
Byá gedáná wati barén damkán



Hórk incho makan bégahá kaddahá
Dawr day duriay dózahá kaddahá

Tonn sar retkag wahday ke nun ér kant
Tai maláráni kahnay tahá kaddahá

Darp wahdé ométáni kollén proshant
Kombá kombá bekan kaddahá kaddahá

Tai zahiráni rahnán bomókán, kanán
Gamshonásén delay bésahá kaddahá

Ér bokkant doén didagáni matáh
Tonn o ápay makan kessahá kaddahá



Dam bortagant negáh wati tonnay nóshagá
Trampé ón pash(t) nakaptag zeminay taláwagá

Emrózay haymahará má gyábánéá jatag
Jáhé bobutén nendagá, ráhé pa lekkagá

Zendá dayán o nawl kanán ráchené pa wat
Daryáay chawlán bandán tai tahtay pádagá

Ásará rahnén chammay tahá chón wáb kayt
Anchén delé bebit ke bomókit nedáragá

Dard o zahirán bell bale wahday brahnagi
Dréga beras(e)tén bakmalén tazhné pa póshagá

Pa kay Monir benakshán é ádéknén gellahán
Kassé edá najant wati jenday chahragá



Armán rókén angar ant
Pa nambién sohbé zarant

Estál morgán wártagant
Áhu chedhekkáyán charant

Chammán srapant bé mósomá
Dazródén hóshámay bar ant

Shap móled ant tai mehlabay
Róch tai lekáhay chákar ant

Táleh gobárén métagay
Áchesh kathirén jamabar ant

Óstáná mókal dát man
Gránkimati zahré bwarant

Dardé jabiná kabr but
Estál chammán andar ant

Ázmudagén dardé dayay
Kandag tai pédáwar ant

Gwáchi may zahiráni Monir
Dorrén waláyattán sar ant



Shántolé dur nálagá ent maná
Báren kay gósh dáragá ent maná

Shénk o estál raptagant tángo
Ázmán tahná kópagá ent maná

Kammén byá ke tará bechárán man
Pa wat zahir buagá ent maná

Róché róché ke watá man gendán
Chárán tai dard sázagá ent maná

Anchó kwahn ent ke tará dát nabit
Wahd dazmálé, kisagá ent maná

Nun pa sháné pa taw man mort kanán
Zendagi dóst dáragá ent maná

Taw ke dur ay mani cherág tai gam
Róche rahmáná bálagá ent maná



Tonnig ent del daryá wáb
Shap zébá na zébá wáb

Pád patátant ekrarán
Chamm nagendant parchá wáb

Wáb makap ke shap pollit
Dar káyant pa swádá wáb

Taw dhiwá taw estálé
Byá may shahrá pédhá wáb

Shap chó kalátá ampostag
Wáb ant chamm tamáshá wáb

Dóshi gwátá sakk kassh(e)tag
Retkant drachkay chérá wáb

Chammán chátá dawr dayán
Dar káyant cha tásá wáb

Mardom wapsant zut Monir
Ágah bant saruná wáb



Morg o mósom buténant
Mardom, mardom buténant

Wahd bobutén bójigé
Áshek málom buténant

Dráj ent ráh, kass gapp nakant
Chédag mardom buténant

Sártén jambar bégáhay
Dóstay mólom buténant

Mehrá butén hankéné
Gam pa mósom buténant

Zend cha margá butén jetá
Yá hamdróshom buténant

Pand janán ant chamm Monir
Keshk ábréshom buténant



Chammán wábé lonthán dwáé rahn kotag
Má del móket yá donyáé rahn kotag

Tai é ganóká pa taw hecchi dát nakot
Yakk emrózé yakk pardáé rahn kotag

Byá ke watára man cha sawásán pach geptag
Pa tai bramshán chammi táé rahn kotag

Marchi padá cha zendá gámé pash(t) kaptén
Marchi padá má yakk dáwáé rahn kotag

Layb kotag gón tonnay chawlán dáem má
Trampé katthet yá daryáé rahn kotag



Hamá jáhá
Ke labzáni golén dhiwá
Darámad bant cha áwázán
Cha mánáay poténkán gár bit
Ezmay sagáray zeh
Hamá jáhá
Man tahná pa wat o pa taw
Damáné sázagay johdá goláésh án
Pa man é shayrsázi
Na dege shogolé na nimóné

